

Izvještaj o radu Studentskog parlamenta Univerziteta FINRA Tuzla

Studentski parlament Univerziteta FINRA Tuzla predstavlja najviše predstavničko tijelo studenata koje aktivno učestvuje u kreiranju i unapređenju studentskog standarda, akademskog života i ukupnog rada Univerziteta.

Kroz razne inicijative, projekte i saradnju s menadžmentom Univerziteta FINRA, Studentski parlament teži da zastupa interese studenata, podstiče njihovu uključenost u akademsku i širu društvenu zajednicu, te doprinosi stvaranju kvalitetnijeg i podsticajnijeg obrazovnog ambijenta.

Ovaj izvještaj pruža pregled aktivnosti, projekata i inicijativa koje je Studentski parlament realizovao u proteklom periodu, sa ciljem transparentnosti rada i kontinuiranog unapređenja u skladu s potrebama studenata i strateškim pravcima razvoja Univerziteta FINRA.

April 2025.

Učešće na poslovnoj akademiji "Otkrij svoj potencijal" – Sarajevo, april 2025.

Od 6. do 8. aprila 2025. godine, studenti Univerziteta FINRA Tuzla imali su priliku učestvovati na dvodnevnoj poslovnoj akademiji za mlade pod nazivom „*Otkrij svoj potencijal*“, koja je održana u Sarajevu u organizaciji International Creativity Company (ICC). Ova akademija okupila je mlade i ambiciozne studente iz različitih krajeva Bosne i Hercegovine s ciljem razvijanja ličnih, profesionalnih i liderskih vještina.

U uvodnom dijelu programa prisutnima se obratio rektor Univerziteta FINRA, prof. dr. sc. Ismet Kalić, koji je istakao značaj cjeloživotnog učenja, ličnog razvoja i ulaganja u znanje kao temelj uspješne karijere.

Tokom programa, učesnici su imali priliku prisustvovati nizu interaktivnih radionica i predavanja koje su vodili akademski i stručni predavači, među kojima su bili i profesori Univerziteta FINRA. Teme radionica bile su fokusirane na razvoj komunikacijskih sposobnosti, timski rad, preduzetništvo, kao i savremene izazove u poslovnom svijetu.

Posebnu čast Univerzitetu FINRA donio je student treće godine, Adin Glogić, koji je osvojio drugo mjesto u nagradnom kvizu znanja, demonstrirajući zavidan nivo znanja i snalažljivosti.

Učešće u ovoj akademiji studentima je pružilo izuzetnu priliku za sticanje novih znanja i praktičnih vještina, kao i za umrežavanje sa studentima i stručnjacima iz različitih oblasti. Ovakve aktivnosti

doprinosu ne samo ličnom razvoju studenata, već i jačanju ugleda Univerziteta FINRA Tuzla na akademskoj sceni Bosne i Hercegovine.



Obilježavanje Dana planete Zemlje – EKO KVIZ, 22. april 2025.

Povodom obilježavanja Dana planete Zemlje, 22. aprila 2025. godine, Studentski parlament Univerziteta FINRA Tuzla, u saradnji sa studentima studijskog programa Ekološka poljoprivreda, organizovao je *EKO KVIZ* – edukativno-zabavni događaj posvećen podizanju svijesti o značaju zaštite životne sredine i principima održivog razvoja.

Kviz je okupio studente različitih studijskih programa koji su, kroz dinamična i interaktivna pitanja, imali priliku da provjere i prošire svoje znanje iz oblasti ekologije, klimatskih promjena, reciklaže, očuvanja prirodnih resursa i ekološki prihvatljivih praksi. Cilj aktivnosti bio je da se na kreativan način podstakne ekološka osviještenost među mladima te da se istakne uloga svakog pojedinca u očuvanju naše planete.

Za najuspješnije učesnike obezbijedene su simbolične nagrade, dok su svi prisutni nagrađeni pozitivnom energijom, znanjem i dodatnom motivacijom da svojim svakodnevnim izborima doprinesu zaštiti okoliša. Ova aktivnost još jednom je pokazala snažan angažman studenata Univerziteta FINRA u promovisanju društveno odgovornih vrijednosti.



Novembar 2024.

Studentsko veče povodom Svjetskog dana studenata – 15. novembar 2024.

U povodu obilježavanja Svjetskog dana studenata, 15. novembra 2024. godine, Studentska organizacija Univerziteta FINRA Tuzla upriličila je nezaboravno *studentsko veče* ispunjeno radošću, muzikom i zajedništvom. Događaj je održan u svečanoj i veseloj atmosferi, uz bogat kulturno-zabavni program koji je okupio veliki broj studenata različitih studijskih programa.

Za odličnu muziku i energiju večeri pobrinuli su se poznati DJ Mima i Nermina Mamanović sa svojim bendom, dok je dodatnu emociju i poseban umjetnički pečat programu dao solo nastup mladog i talentovanog studenta Demira Isića, koji je svojim glasom osvojio srca publike.

Program je obogaćen i *nagradnim kvizom znanja*, koji je izazvao veliko interesovanje i takmičarski duh među studentima.

Najuspješniji učesnici nagrađeni su vrijednim nagradama – tablet, pametni sat i Bluetooth slušalice, što je dodatno doprinijelo sveukupnom entuzijazmu i veselju.

Ova manifestacija bila je prilika da se studenti opuste, druže i međusobno povežu u neformalnom okruženju, što je značajno doprinijelo jačanju osjećaja pripadnosti zajednici Univerziteta FINRA. Studentsko veče je još jednom potvrdilo važnost ovakvih događaja u izgradnji pozitivne akademske klime i osnaživanju studentskog duha.



Decembar 2024.

Humanitarna akcija – Novogodišnji paketići za djecu bez roditeljskog staranja, decembar 2024.

U duhu solidarnosti, empatije i društvene odgovornosti, Studentska organizacija Univerziteta FINRA Tuzla je u decembru 2024. godine organizovala i realizovala humanitarnu akciju s ciljem obradovanja djece bez roditeljskog staranja iz Tuzle uoči novogodišnjih praznika.

Kroz zajedničko zalaganje studenata, profesora i zaposlenika Univerziteta, prikupljena su sredstva za izradu i kupovinu **70 novogodišnjih paketića**, koji su pažljivo pripremljeni u skladu sa željama i interesovanjima djece. Na taj način, svaki paketić je predstavljao više od poklona – bio je znak pažnje, podrške i topline koji šalje poruku da nisu zaboravljeni.

Ova plemenita akcija još jednom je potvrdila spremnost studenata Univerziteta FINRA da se aktivno uključe u društveno korisne projekte i doprinesu zajednici u kojoj žive i djeluju. Istovremeno, ovakve inicijative jačaju humanističke vrijednosti među mladima i doprinose izgradnji saosjećajnijeg i odgovornijeg društva.



Planirane aktivnosti:

- Dana 21. juna 2025. godine, planiran je roštilj i druženje na Ilinčici kao prilika za neformalno okupljanje studenata i članova parlamenta.
- Tokom mjeseca jula 2025. godine, planiran je izlet u Kraljevu Sutjesku i Visoko, kao dio programa za jačanje studentske zajednice i promovisanje kulturno-historijskih vrijednosti naše regije.

